

ONOMASTICON URBIUM ET LOCORUM SACRÆ SCRIPTURÆ.

SEU

LIBER DE LOCIS HEBRAICIS
AB EUSEBIO GRÆCE PRIMUM,
DEINDE AB HIERONYMO LATINE SCRIPTUS.

DIVI

HIERONYMI EUSEBII

In loca Hebræica

PROŒMIUM.



USEBIUS, qui à beato Pamphilo martyre cogno-
mentum sortitus est, post decem ecclesiasticæ histo-
riæ libros, post temporum canones, quos nos Latī-
nā linguā edidimus, post diversarum vocabula natio-
num, quæ quomodo apud Hebræos olim dicta sint,
& nunc dicantur, exposuit; post¹ topographiam ter-
ræ Judææ, & distinctas tribuum sortes; ipsius quo-
que Hierusalem, templique in ea cum brevissima ex-
positione picturam, ad extremum in hoc opusculo
laboravit, ut congregaret nobis de sancta Scriptura

omnium penè urbium, montium, fluminum, viculorum & diversorum lo-
corum vocabula: quæ vel eadem manent, vel immutata sunt postea, vel ali-
qua ex parte corrupta. Unde & nos admirabilis viri sequentes studium, se-
cundum ordinem litterarum, ut sunt in Græco posita, transtulimus, relinquen-
tes ea quæ digna memoriâ non videntur, & pleraque mutantes. Semel enim
in temporum libro præfatus sum, me vel interpretem esse, vel novi operis
conditorem, maximè cum quidam, vir primis imbutus litteris, hunc eundem
librum ausus sit in Latinam linguam non Latinè vertere: cujus imperitiam ex
comparatione eorum, quæ transtulimus, prudens statim lector inveniet; ut
enim excelsa mihi non vindico, ita terræ² inhærentia me supergredi posse credo.

¹ Ed. Parisina habet *Chorographiam*, monetque nonnullos Codd. MSS. habere *Cosmographiam*, alios *Orthographiam*.
CLERICUS.

² Parisina Ed. habet *coherentia*, quamvis agnoscat hanc quoque lectionem esse in aliis Codd. MSS. IDEM.